



Fasnachtsdangg 2026

S isch wider Zyt für «vyle Dangg»!
An Glygge, Wääge Schnitzelbangg
Dangg an divärsi Variante
Vo Super Sujet-Liferante!
Nit alles isch hüt nur zum Lache
S git Mänggs, wo d findsch, dasch nit ganz bache!
Gnau das darf d Fasnacht persifliere:
Verspiilt sy und im Üble riehere!
Dr Dangg gilt au de guete Gaischter
De Fasnachts-Service-Public-Laischter:
Dr Schuggerei und de Kadette
Au dääne, wo dien hälfe rette
Sanideet, Allmändverwaltig
Au s Baudep hilft ys wider gwaltig
E Dangg de Wäase mit de Bääse
Wo s letschte Röppli zämmeläase!
Dr Petrus het sy Job au gmacht
D Sunnen und d Frau Fasnacht lacht!
Mer hänn die drei Dääg wirgglig gnosse
Jetz wird d Scharadekische gschlosse!
Und nonemoll e Danggschön alle
Uns het die Friehtigs-Fasnacht gfalle!
Blyybet verspiilt und gniessets, Lyt!
Ganz frieh kunnt wider unseri Zyt!
S nägggscht Johr isch, scho Mitti Hornig
D Fasnachtswält für uns in Ornig!
Härzlig: **sFasnachts-Comité**